



Sud Bosne i Hercegovine
Суд Босне и Херцеговине

Broj: S1 3 IŽ 038349 20 IŽ
Sarajevo, 27.10.2020.godine

Sud Bosne i Hercegovine u Sarajevu, u Apelacionom upravnom vijeću, sastavljenom od sudija Mirsade Džindo, kao predsjednika vijeća, Zvezdane Antonović i Vesne Trifunović, kao članova vijeća, odlučujući o žalbi Smiljane Kozomara, Bogdaši bb, Livno, izjavljenoj protiv odluke Centralne izborne komisije Bosne i Hercegovine, broj: 05-1-07-1-998/20 od 01.10.2020.godine, u nejavnoj sjednici, održanoj dana 27.10.2020.godine, donio je

R J E Š E N J E

Žalba se odbija

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, podnosiocu žalbe odbijen je upis u izvod iz Centralnog biračkog spiska za glasanje izvan BiH za Lokalne izbore 2020. godine, za ukupno 27.960 birača po prijavama podnesenim do 01.09.2020. godine.

Protiv ove odluke žaliteljica je blagovremeno uložila žalbu u kojoj moli da joj se omogući glasanje putem pošte na adresu na koju se prijavila.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Prema stanju u spisu ovo vijeće konstatuje da je CIK BiH, prije donošenja ožalbene odluke, putem svoje web stranice izvjestila podnosioca žalbe, da njegova prijava za glasanje izvan BiH sadrži više nedostataka, jer nije dostavljen dokaz o identitetu i ostavio mu rok da taj nedostatak otkloni. Podnosilac žalbe u ostavljenom roku nije postupio prema obavještenju CIK BiH.

Postupajući na način opisan u prednje utvrđenom činjeničnom stanju podnosilac žalbe je postupio suprotno odredbi člana 3.15 stav (1) Izbornog zakona BiH („Službeni glasnik BiH“ broj 23/01 do 31/16), kojom je propisano da državljanin BiH koji živi u inostranstvu, a ima biračko pravo u skladu sa Zakonom i upisan je u

Centralni birački spisak, da bi se nalazio u izvodu iz Centralnog biračkog spiska dužan je da se za svake izbore prijavi CIK BiH. Prijava mora biti zaprimljena u CIK BiH prije roka koji odredi CIK BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

U konkretnom slučaju žaliteljica nije uz prijavu dostavila sve potrebne i propisane podatke, tj. dokaz o identitetu koji bi potvrdio da su ispunjeni uslovi da se u smislu odredbe člana 5.12 stav (4) Izbornog zakona BiH nađe na izvodu iz Centralnog biračkog spiska za glasanje van BiH. Naime, validnim dokazom o identitetu smatra lična karta /osobna iskaznica ili vozačka dozvola ili pasoš/putnovnica Bosne i Hercegovine.

Takođe, napomene radi, žaliteljici nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

Iz navedenih razloga Apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

Predsjednik vijeća
S u d i j a
Mirsada Džindo